



*Senin, 15 Juni 2023*  
**Ogen: Matius 15:4**



**Mehamatlah Man Orang Tua**



**O**rang tua e me pemere Dibata. Patut si ergaken ras si kelengi. Mbue alasenta guna erbahan mehuli man orangtuanta. Anem enterem nge orangtua la serta, tapi e labo meneken jasa si enggo iberekenna i bas mpebelin-belin kita. Kasih orangtua sepanjang jaman, tapi kasih anak sepanjang galah. Ungkapen enda nuduhkan uga bagesna ras uga gedangna keleng ate ras kesabaren orang tua nandangi anak-anakna, seh kita metua pe adi lit dengan orangtuanta, lalap nge atena ikepkepna. La seri ras kita anak, kenca kita mbelin ersura-sura gelah banci mandiri, sitadingken me orangtuanta, si bengket jabunta, sekali-sekalin kal ngenca banci kita ku rumah orangtua. Lit kap pe anak e rubat ersenina-erturang i bas ngoratken orangtua.

Tuhan Jesus erdebat ras guru-guru agama Jahudi, kerna uga pentingna mehamat man orang tua si ipraktekken i bas geluh si tep-tep wari. Ise si la mehamat man orangtua maka ia kena ukum. La mehamat e me ngutuki, ngarapken si la mehuli jadi man orangtua, nehken kata-kata si kasar ras nokohi orang tua e me bentuk kekerasen man orangtuanta. Terdauhen, adi sekalak anak la mediate, la nampati/ngelai orang tua e pe tanda la mehamat man orangtua. Kalak si bage la banci la iukum mate. Sabap leben nge mate pusuhna, gelap, sabap uga nina engkelengi kalak si deban adi si berjasa kal pe bas geluhna, mpebelin ia, erjuang man bana pe la ia ngasup nehken kehamaten man bana. Labo tuhu lit iarapken pe kekelengen i bas kalak si mehamat man orang tua.

Terlepas bas kekurangan ras kelemahen si lit i bas orangtuata, asa lit denga ia, bahanlah perbahanen mehuli man bana, pepulung erta surga arah mehamat man orang tua.